

# Jü Carta San Judas Jïojtekähui

## *Teboteri*

<sup>1</sup>Judas, Jesucristota saulero, entok Jacobota saila, huame Dios Atchaipo santopo núnurimmehui entok Jesucristopo ëriarim, <sup>2</sup>Nak jiokolihuame, yánti éehuame, entok yore nákuhame, ïri juebénasi enchimneu burunake.

### *Jume ára nókichiriata majtíame*

*(2 Pedro 2:1-17)*

<sup>3</sup>Eme nákuhame, tüisine enchimneu jïojte péiyay, juka jínëuriata nau itom jípurë bétana; én éntok úttea enchimneu ín jïojtenakëhui, kuttílasí enchimneu nokaka, óusi eeaka enchim nok nássuanakë béchíbo, Diostat ehuaipo. Bueítuk jü séjtul huëpo santom mak-ri. <sup>4</sup>Bueítuk huate yoremem éhuil áma kimula, huame bannaataka naateka noki béttesi ámet chúpatukaí béchíbo náikiari. Juëna yóremem; huaka Diosta tü eäu náyotekam yéuriapo bénasi bem jo bárëu johua; entokim Diosta kaa anë tíiya, huaka kaabeta chë áa béppa nésahuemta, entok juka itom Señor Jesucristota.

<sup>5</sup>Enchimne áu huáati ía, bueítuk sejtulem béja ä jüneriai,

bueítuk jü Señor juka pueblota jínëuk, Egiptopo yeu am núk sikari, chúkula éntok huame kaa ä súalekame am súuhuak.

<sup>6</sup>Entok jume bem ángelesimtukä páman kaa emo ëriakame, ál-la bem áma anëu tö sájakame, kaa machiku am ëriala, yü tutti bem pereesomtunakepo, buére taahuarit nokta ámet chúpëpo tájti. <sup>7</sup>Ket jü Sodooma entok Gomoora pueblom bënna, entok jume buere joaram áme chíkola jokame, jume áme bénasi kaa emo jubeka náu jíapsihuäpo entok täbuiasi emo jujubeka at joyhualataka kara ä tojaka; ímëri ejemplomtuari, táijta kaa jaibu tutukëpo jiokot aneka.

<sup>8</sup>Júnëlituk junne, alëbénasi jume tettenkume bem takaahuamim násonte, Diosta yäuratam kaa yöre, entokim jume Diosta ángelisim buere úttiata jípureme bette nokpo bejre. <sup>9</sup>Të jü arcángel Miguel diablotamak nássuäka Moiséjta takaahua béchíbo, bétte juenasi nokhuamta huëpo kaa bat nookak, ál-la ínel jiaahuak: “Jü Señor kutti nokta emót chupanake.” <sup>10</sup>Të ímëri juenasi bette noktam nooka,

símeta kaa bem täyähui bétana; entok juka bem täyaka jíápsabet entokim emo násonte, jume animalim kaa susuakame bénasi.

<sup>11</sup> ¡Jiokochi áme béchibotunake! Jume Caínta böo nukame; entokim tómipo emo nénkak, Balaamta böt jibekäpo; entokim kókkok, Coréta huatem bej-reka áu tóboktiakäpo. <sup>12</sup> Ímëi áma chicha machisim bittu, enchim náu jihuäpo emo nakhuäpo nau anëpo. Kabetam tihueka bempom jíba enchim násuk emo ania báreka eiya. Namuta kaa báaka bénamme; jekata am hueriabareü bícham kaate, júyam kaa tatakame bénamme. Guosa huëpom kókkola, entokim nahuamak békti póponri.

<sup>13</sup> Bahue máarem úttiaka bem kaa tihuëpom sómochia, huame chókim naa tenneme bénasim mamachi; huämei béchibo jü kaa máchiraa áme bétana náikiari jíba béchibo.

<sup>14</sup> Ímëi bétana ket nookak, jü Enoc, hua Adántat yeu sákariam guoybusanim huëpo huéeme, ínel jíaka: “Én ími yepsak, jü Señor, jume santo juebena míilimmaki, <sup>15</sup> símemmet bétte nokta chúpa báreka, éntok huame kaa tühuata joame jüneetua báreka, síme kaa tüisi bem ayuka bétana, entok síme jume Diosta bej-reka béttesi áacham nokakä béchibo.” <sup>16</sup> Ímëi éhuil jábemmet nonokame, huatemmechi juenak nooka, bem türë eä páman kateka, bem teniay buéresi jita éettejhua, entok jábemmakim tü áne, jita ámet yeu huik báreka.

### *Jü kutti nooki*

<sup>17</sup> Të eme, ín nákehui, áahuem huáate, hua noki bannaataka jume Señor Jesucristota apóstolim nokakäbehui, <sup>18</sup> huame ínel enchimieu jíakammehui: “Júnakoy taahuata yumäpo yore junnerianakeme yeu machinake, huam bem juëna éeri páman rejtinakeme.” <sup>19</sup> Imëri emo náikimtehuamta johua, huaka bem takaahua ukulëu boojoriaka; entokim Espíritu Santota kaa jípure.

<sup>20</sup> Të emëe, ín nákehui, enchim Dios éehuame tuysi santosi täyahuaamtachi, huachirem emo yoturria, Espíritu Santopo oraciónta joaka. <sup>21</sup> Diosta yore nakepem jíba aane, ä boobíchaka juka Señor Jesucristota yore nak jiokolëhui, yü jíapsihuamta béchibo.

<sup>22</sup> Huame huatem kara huitti ä súalemmehuem nooka, am jíapsi yúyüi béchibo. <sup>23</sup> Huatemem jínëu, huam táijpo yeu am huíikeka; huatem éntokem nak jiokolë, sum éaka, katem ä jipu peiya, juka takahuat bem sánko chicha machiku nasontulata.

### *Diosta úttihuame*

<sup>24</sup> Huä tua útteakame kaa enchim huáttinakë béchibo enchim suayanake, entok kaita chicha machik enchimmet ayuk, áman enchim nüpanake, símek béppa uiyorik ayukäpo, buére al-lerimaki. <sup>25</sup> Jü huépul Dios jíbba, símeta täyame, itom jínëulero, jü símek

---

béppa ujyooria entok síme  
Rey nésauri áa béchībo, jū  
rey nesauri entok utteara,

ä yōrihuame, ěni éntok  
jíba yū huasuhuasuktiapo.  
Júnentunake.